



Na osnovu člana 8. i 13. Zakona o principima lokalne samouprave u Federaciji BiH ("Službene novine F BiH", br. 46/08 i 51/09), člana 16. i 17. Zakona o poticaju razvoja male privrede ("Službene novine Kantona Sarajevo", br. 29/15), člana 57. Statuta Općine Ilijaš ("Službene novine Kantona Sarajevo", br. 20/09 - prečišćeni tekst i 46/18), člana 6., stav (2) Odluke o podsticaju prema pojedinim djelatnostima fizičkih lica (obrtima i obrtu srodnim djelatnostima) početnicima u biznisu u 2026. godini ("Službene novine Kantona Sarajevo", br. 19/26), te člana 4., Pravilnika o uslovima, kriterijima i postupcima u provođenju Odluke o podsticaju prema pojedinim djelatnostima fizičkih lica (obrtima i obrtu srodnim djelatnostima) početnicima u biznisu u 2026. godini, br. 01/2-11-1278/26 od 18.05.2026. godine, Općinski načelnik na prijedlog Službe za privredu i finansije, **o b j a v l j u j e:**

JAVNI POZIV

prema pojedinim djelatnostima fizičkih lica (obrtima i obrtu srodnim djelatnostima) početnicima u biznisu u 2026. godini

I OPĆE INFORMACIJE

Cilj podsticaja iz člana 1. ove Odluke je podrška pojedinim djelatnostima fizičkih lica (obrtima i obrtu srodnim djelatnostima) početnicima u biznisu u 2026. godini u nabavci nove dugotrajne imovine (mašina, alata i opreme), radi povećanja zaposlenosti i uvođenja savremenih tehnologija.

Prijavom na ovaj Javni poziv zainteresirani aplikanti, ostvaruju pravo na finansijski podsticaj u ukupnoj vrijednosti od 5.000,00 KM, uz uslov ispunjenja uslova utvrđenih Odlukom o podsticaju prema pojedinim djelatnostima fizičkih lica (obrtima i obrtu srodnim djelatnostima) početnicima u biznisu u 2026. godini ("Službene novine Kantona Sarajevo", br. 19/26) i Pravilnikom o uslovima, kriterijima i postupcima u provođenju Odluke o podsticaju o podsticaju prema pojedinim djelatnostima fizičkih lica (obrtima i obrtu srodnim djelatnostima) početnicima u biznisu u 2026. godini br. 01/2-11-1278/2026 od 18.05.2026. godine, koji je sastavni dio ovog Javnog poziva.

Korisnici ostvaruju pravo na podsticaj putem Službe za privredu i finansije Općine Ilijaš na bazi ovog Javnog poziva, koji kontinuirano traje od dana objave do 31.12.2026. godine.

Ovaj Javni poziv se objavljuje na zvaničnoj "web" stranici Općine Ilijaš (www.ilijas.ba), kao i na zvaničnim Facebook i Instagram stranicama Općine, te na oglasnoj tabli u prostorijama Općine Ilijaš. Za datum objave Javnog poziva smatra se dan kada je isti objavljen na zvaničnoj "web" stranici i društvenim mrežama Općine Ilijaš (Facebook i Instagram).

II KORISNICI PODSTICAJA

Korisnici podsticaja su djelatnosti fizičkih lica, registrovane u skladu sa Zakonom o obrtu i srodnim djelatnostima ("Službene novine F BiH", br. 75/21), kao osnovno zanimanje na području Općine Ilijaš izuzimajući djelatnosti iz oblasti: poljoprivrede i saobraćaja (taksi prijevoz, autoprijevoz, auto škole i sl.), sa prijavljenim početkom rada u periodu 01.01.2026. godine do 31.12.2026. godine, koje ispunjavaju uslov kontinuiranog obavljanja djelatnosti u trajanju od minimalno 3 (tri) mjeseca od dana prijave početka rada (obavljanja djelatnosti).

Korisnici podsticaja ne mogu biti lica koja su u prethodnom periodu od 12 (dvanaest) mjeseci od dana podnošenja prijave izvršila odjavu djelatnosti, koja je bila registrovana na području Općine Ilijaš u skladu sa Zakonom o obrtu i srodnim djelatnostima kao osnovno zanimanje, izuzimajući: djelatnosti iz oblasti: poljoprivrede i saobraćaja (taksi prijevoz, autoprijevoz, auto škole i sl.).



Korisnici podsticaja ne mogu biti lica koja koriste aktivnu podsticajnu mjeru drugog nivoa vlasti po bilo kojem osnovu u momentu prijave na Javni poziv.

Korisnici podsticaja su dužni priložiti Izjavu o visini korištenih "de minimis" pomoćima i drugim državnim pomoćima u BiH.

III POTREBNI DOKAZI ZA OSTVARENJE PRAVA NA PODSTICAJ

Dokazi koji se pribavljaju putem Službe za privredu i finansije po službenoj dužnosti su sljedeći:

- a) Rješenje o registraciji djelatnosti fizičkog lica u skladu sa Zakonom o obrtu i srodnim djelatnostima ("Službene novine FBiH", br. 75/21)
- b) Uvjerenje Službe za privredu i finansije da aplikant (fizičko lice) u proteklom periodu od 12 (dvanaest) mjeseci nije odjavio djelatnost koja je bila registrovana na području Općine Ilijaš u skladu sa Zakonom o obrtu i srodnim djelatnostima kao osnovno zanimanje, izuzimajući djelatnosti iz oblasti: poljoprivrede i saobraćaja (taksi prijevoz, autoprijevoz, auto škole i sl.)
- c) Uvjerenje Službe za privredu i finansije da je registrovana djelatnost aktivna (nije izvršena trajna ili privremena odjava obavljanja djelatnosti) na dan podnošenja prijave na Javni poziv
- d) Uvjerenje Službe za privredu i finansije da je registrovana djelatnost aktivna (nije izvršena trajna ili privremena odjava obavljanja djelatnosti), po isteku perioda od 3 (tri) mjeseca od dana podnošenja Izveštaja o utrošku sredstava, što je potrebni uslov/dokaz za izvršenje II (druge) tranše finansiranja.

Dokazi koje korisnik podsticaja (aplikant, odnosno vlasnik obrta ili obrtu srodne djelatnosti) prilaže u postupku prijave na Javni poziv ili po obavijesti/pozivu o ispravci zahtjeva/podneska su sljedeći:

- e) Izjava aplikanta o visini korištenih "de minimis" pomoćima i drugim državnim pomoćima u BiH (uz obaveznu ovjeru potpisa aplikanta, davaoca Izjave kod nadležnog organa uprave ili notara)
- f) Izjava aplikanta da nije korisnik aktivne podsticajne mjere drugog nivoa vlasti po bilo kojem osnovu u momentu prijave na Javni poziv (uz obaveznu ovjeru potpisa aplikanta, davaoca Izjave kod nadležnog organa uprave ili notara)
- g) Izjava aplikanta da će doznačena podsticajna sredstva iskoristiti najkasnije do 31.12.2026. godine u svrhu nabavke nove dugotrajne imovine poštujući odredbe člana 7. ovog Pravilnika ili izjava aplikanta da je tokom 2026. godine već nabavio novu dugotrajnu imovinu koja je adekvatna odredbama, odnosno koju će koristiti poštujući odredbe člana 7. ovog Pravilnika
- h) Uvjerenje o poreznom identifikacionom broju – ID broj (ovjereni kopija)
- i) Bankovni račun registrovane djelatnosti na koji će se doznačiti podsticajna sredstva (Ovjereni kopija potvrde/uvjerenja banke)
- j) Prijava na obavezno osiguranje aplikanta u Poreznoj upravi FBiH (Ovjereni kopija obrasca JS 3100).

IV OBAVEZE KORISNIKA PODSTICAJA

Korisnik podsticaja je u obavezi dodijeljena finansijska sredstva opravdati kroz nabavke nove dugotrajne imovine u toku 2025. godine sa ciljem obavljanja registrovane djelatnosti, uz zabranu upotrebe iste u sljedeće svrhe:

- djelatnost u sektorima ribarstva i akvakulture;
- djelatnost u sektoru poljoprivrede;
- djelatnost usmjerena izvozu, odnosno djelatnost direktno povezana s izvezenim količinama, s uspostavom i funkcionisanjem distributivne mreže ili s drugim tekućim troškovima povezanim s izvoznom djelatnošću;
- uslovljavanje upotreba domaćih proizvoda umjesto uvezenih;
- nabavku dugotrajne imovine vezane za održavanje ili upotrebu vozila za cestovni prijevoz tereta, odnosno nabavku mašina, alata i opreme koji se mogu koristiti u svrhu obavljanja prijevoza za potrebe obavljanja registrovane djelatnosti.

Općina Ilijaš će sa korisnicima podsticaja sklopiti pojedinačne Ugovore o međusobnim pravima i obavezama, koji će sadržavati sljedeće bitne elemente: iznos sredstava koja se dodjeljuju korisniku podsticaja, namjene korištenja sredstava, rok za utrošak sredstava, način i rok izvještavanja, te sankcije za nepoštivanje Ugovora.

V NAČIN DODJELE PODSTICAJA

Pravo na podsticaj se utvrđuje Rješenjem o dodjeli podsticaja. Doznaka sredstava prema korisniku podsticaja, uz uslov ispunjenosti propisanih uslova utvrđenih Odlukom o podsticaju i Pravilnikom se vrši kroz dvije tranše finansiranja:

- I (prva) tranša u iznosu od 3.500,00 KM doznajuje se u početnoj fazi biznisa u roku od 7 (sedam) dana od dana pravosnasnažnosti Rješenja o dodjeli podsticaja,
- II (druga) tranša, u preostalom iznosu do maksimalnog ukupnog iznosa podsticaja, doznajuje se nakon isteka 3 (tri) mjeseca od dana podnošenja izvještaja sa dokazima o nabavci nove dugotrajne imovine (mašine, alati, oprema), uz uslov kontinuiranog obavljanja djelatnosti, što znači da nije izvršena trajna ili privremena odjava obavljanja djelatnosti u momentu doznake II (druge) tranše finansiranja.

Ukupan iznos podsticaja po osnovu obje tranše finansiranja može iznositi maksimalno 5.000,00 KM, s tim da korisnik podsticaja nije obavezan iskoristiti puni iznos. U slučaju da je vrijednost nabavljene dugotrajne imovine u toku 2026. godine manja od 5.000,00 KM, odobrava se manji iznos podsticaja od 5.000,00 KM na osnovu dostavljenog izvještaja i pratećih dokaza o izvršenoj nabavci (računi/fakture dobavljača uz dokaz o izvršenom plaćanju).

Neispunjenje uslova za doznaku II (druge) tranše finansiranja ne obavezuje korisnika podsticaja na povrat prethodno doznačenih sredstava I (prve) tranše finansiranja, pod uslovom da je nabavkom dugotrajne imovine opravdao ukupno doznačena sredstva iz I (prve) tranše finansiranja.

Nezadovoljna stranka ima pravo izjaviti žalbu Drugostepenoj Komisiji Općinskog vijeća Ilijaš u roku od 8 (osam) dana od dana dostavljanja prvostepenog akta: Rješenja kojim se odobrava ili odbija podsticaj, ili Zaključka kojim se obustavlja postupak utvrđivanja prava na podsticaj.

Žalba se podnosi putem organa koji je donio prvostepeni akt, i to: neposredno, usmeno na zapisnik ili poštom preporučeno.

VI MJESTO I NAČIN PODNOŠENJA PRIJAVE NA JAVNI POZIV

Zainteresirani aplikanti se prijavlju na Javni poziv putem propisanog obrasca za prijavu koji je sastavni dio ovog Javnog poziva. Uz obrazac prijave aplikanti dostavljaju potrebne dokaze iz tačke III, stav e), f), g), h), i) i j) ovog Javnog poziva u zatvorenoj kovrti. Aplikant koji nije priložio navedene dokaze u momentu podnošenja prijave, odnosno zahtjeva za ostvarenje prava na podsticaj ima pravo na dopunu podneska, tako što će biti pozvan putem Službe za privredu i finansije, da u datom roku ne dužem od 10 (deset) dana, od dana prijema obavijesti, otkloni utvrđene nedostatke.

Dokazi o ispunjenosti uslova iz tačke III, stav a), b), c), d) i i) ovog Javnog poziva se pribavljaju po službenoj dužnosti putem Službe za privredu i finansije.

Svi prilozi uz prijavu moraju biti u originalu ili ovjerene kopije, te na datim izjavama moraju biti ovjereni potpisi davaoca izjave (aplikanta). Prijave se predaju na protokol Općine Ilijaš ili putem pošte.

Na prednjoj strani koverta mora biti navedeno, sljedeće:

Općina Ilijaš

126.ilijaške brigade br. 16, Ilijaš

71 380 Ilijaš

/"Prijava na Javni poziv početnici u biznisu u 2026. godini– NE OTVARAJ!/"

Na poledini koverta mora biti navedeno, sljedeće:

Naziv podnosioca (ime i prezime vlasnika obrta/obrtu srodne djelatnosti)

Adresa i poštanski broj

Prijave se dostavljaju do 31.12.2026. godine. Neblagovremene prijave će biti odbačene.

VII OSTALE ODREDBE

Općina Ilijaš ne snosi troškove aplikacija nastale u postupku prijave na ovaj Javni poziv. Općina Ilijaš zadržava pravo da poništi objavljeni Javni poziv ili da odbaci sve prispjele prijave u bilo koje vrijeme prije zaključenja Ugovora sa korisnicima podsticaja.

Općina Ilijaš ne snosi odgovornost prema učesnicima Javnog poziva u pogledu aktivnosti koje su preduzeli u postupku apliciranja.

Prispjela dokumentacija se ne vraća aplikantima.

Broj: 01/2-11-1278.1/26

Ilijaš, 19.05.2026. godine

OPĆINSKI NAČELNIK

Amar Džovadžija



Dostaviti:

- Za objavu putem "web" stranice i društvenih mreža
- Za objavu na Oglasnoj tabli Općine
- Odsjek za računovodstvo, Služba za privredu i finansije
- Odjek za privredu i lokalni razvoj, Služba za privredu i finansije
- U predmet